

四庫全書

子部

# 欽定四庫全書

子部

神農本草經疏卷十

六至九

詳校官太醫院吏目臣周世泰

編修臣含聖脈覆勘

總校官進士臣繆

琪

校對官中書臣吳

俊

謄錄監生臣左

振麟

欽定四庫全書

神農本草經疏卷十六

明繆希雍撰

獸部上品

總二十種今疏其要者十種

龍骨

齒附

麝香

牛黃

熊脂

膽附

象牙

膽皮附

白膠

阿膠

牛乳

酥

乳腐

龍骨味甘平微寒無毒主心腹鬼疰精物老魅欬逆洩  
痢膿血女子漏下癥瘕堅結小兒熱氣驚癇療心腹煩  
滿四肢枯痿汗出夜卧自驚恚怒伏氣在心下不得喘  
息腸癰內疽陰蝕止汗縮小便弱血養精神定魂魄安  
五藏 白龍骨療夢寐洩精小便洩精 齒主小兒大  
人驚癇癰疾狂走心下結氣不能喘息諸瘕殺精物小  
兒五驚十二癇身熱不可近大人骨間寒熱又殺蠱毒

得牛黃人參良畏

石膏忌魚及鐵

疏○龍稟陽氣以生而伏於陰為東方之神乃陰中之陽鱗蟲之長神靈之物也故其骨味甘平氣微寒無毒內應乎肝入足厥陰少陽少陰兼入手少陰陽明經神也者兩精相合陰陽不測之謂也神則靈靈則能辟邪惡蠱毒魘魅之氣及心腹鬼疰精物老魅遇之則散也欬逆者陽虛而氣不歸元也氣得斂攝而歸元則欬逆自止其性濇以止脫故能止洩痢膿

血因於大腸虛而久不得止及女子漏下也小兒心  
肝二臟虛則發熱熱則發驚癇驚氣入腹則心腹煩  
滿斂攝二經之神氣而平之以清其熱則熱氣散而  
驚癇及心腹煩滿皆自除也肝氣賊脾脾主四肢故  
四肢痿枯肝寧則熱退而脾亦獲安故主之也汗者  
心之液也心氣不收則汗出肝心腎三經虛則神魂  
不安而自驚收斂三經之神氣則神魂自安氣得歸  
元升降利而喘息自平汗自止也肝主怒肝氣獨盛

則善恚怒魂返乎肝則恚怒自除小腸為心之腑膀胱為腎之腑二經之氣虛脫則小便多而不禁臟氣斂則腑亦隨之故能縮小便及止夢寐洩精小便洩精兼主溺血也其主養精神定魂魄安五臟者乃收攝神魂閉濇精氣之極功也又主癥瘕堅結腸癰內疽陰蝕者以其能引所治之藥黏著於所患之處也按龍骨入心腎腸胃龍齒單入肝心故骨兼有止瀉濇精之用齒惟鎮驚安魂魄而已凡用龍骨先煎

香草湯洗二度搗粉絹袋盛之用燕子一隻去腸肚  
安袋於內懸井上面一宿取出研粉入補腎藥中其  
効如神又法酒浸一宿焙乾研粉水飛三度用如急  
用以酒煮焙乾或云凡入藥須水飛過曬乾每觔用  
黑豆一斗煮一伏時曬乾用否則著人腸胃晚年作  
熱也

主治參互

仲景方同牡蠣入柴胡桂枝各湯內取其收斂浮越



之正氣固脫而鎮驚 同遠志等分為末煉蜜丸如  
梧子大硃砂為衣每服三十九丸蓮心湯下治勞心夢  
遺 梅師方睡即洩精白龍骨四分韭子五合為散  
空心酒服方寸匕 又方泄瀉不止白龍骨白石脂  
等分為末水丸梧子大紫蘇木瓜湯下量大人小兒  
用亦治久痢休息 姚和衆方久痢脫肛白龍骨粉  
撲之 龍齒同荊芥澤蘭牡丹皮蘇木人參牛膝紅  
花蒲黃當歸童便治產後惡血撲心妄語顛狂如傷

寒發狂者切不可認作傷寒治誤則殺人 同牛黃  
犀角鉤藤鈎丹砂生地黃茯神琥珀金箔竹瀝天竹  
黃蘇合香治大人小兒驚癇癲疾

簡誤

龍骨味瀼而主收斂凡洩痢腸癖及女子漏下崩中  
溺血等證皆血熱積滯為患法當通利疎泄不可便  
用止瀼之劑恐積滯瘀血在內反能為害也惟久病  
虛脫者不在所忌

麝香味辛溫無毒主辟惡氣殺鬼精物溫瘡蠱毒癰疽  
去三蟲療諸凶邪鬼氣中惡心腹暴痛脹急痞滿風毒  
婦人難產墮胎去面黧

音孕

目中膚翳久服除邪不夢寤

麝寢通神仙

忌大蒜

疏○陶弘景云麝常食柏葉又噉蛇子以為其香必  
非因噉蛇而結蘇頌乃云夏月食蛇多至寒則香滿  
入春臍內急痛自以爪剔出陶云五月得香往往有  
蛇皮骨豈有食蛇逾一年而皮骨尚不化者乎不知

麝乃山獸好食香木芳草如栢葉之類故其氣聚於臍而結成是香或遇蛇亦噉但不結香耳如必噉蛇多而後有香則此藥必大毒難近之物安得味辛氣溫無毒耶甄權言苦辛其香芳烈為通關利竅之上藥凡邪氣著人淹伏不起則關竅閉塞辛香走竄自內達外則毫毛骨節俱開邪從此而出故主辟惡氣殺鬼精物凶邪蠱毒溫瘧中惡心腹暴痛脹急痞滿風毒諸證也其主癰疽者借其氣以達於病所也苦

辛能殺蠱故主去三蟲辛溫主散故能去面黧及目  
中膚翳性能開竅故主難產墮胎也走竄之性而云  
久服除邪不夢寤魔寐通神仙者凡香皆能辟除惡  
氣而通神明故有是功能也日華子云納子宮煖水  
臍止冷帶疾藥性論主小兒驚癇客忤蝕一切癰疽  
膿水今人又用以治中風中氣中惡痰厥猝仆兼入  
膏藥傳藥皆取其通竅開經路透肌骨之功耳

主治參互

同犀角牛黃琥珀龍齒遠志丹砂鉛丹金箔菖蒲真  
珠茯神天竺黃治心氣虛怯驚邪癲癇或夢寐紛紜  
鬼交鬼淫及小兒急驚大人中惡等證 同白及白

斂紅白藥子雄黃烏雞骨煨乳香沒藥冰片為末傳  
一切癰疽疔腫有神 濟生方中風不省麝香二錢  
研末入清油二兩和勻灌之即甦 又方食諸果成

積傷脾作脹氣急用麝香一錢生桂末一兩飯和丸  
菰豆大大人十五丸小兒七丸白湯下蓋果得麝即

落水得桂即枯故也 夏子益奇疾方口內肉毳根  
如線五寸餘如釵股吐出乃能食物捻之則痛徹心  
者麝香一錢研水服之日三自消 續千金方催生  
易產麝香一錢水研服 經驗方鼠咬成瘡麝香封  
之妙并治蠶咬成瘡

簡誤

麝香走竄飛揚內透骨竅臟腑外徹皮肉及筋其性  
能射故善穿透開散東垣云凡風病在骨髓者用之

使風邪得出若在肌肉用之反引風入骨丹溪云五臟之風不可用麝香以瀉衛氣二公之言誠得其旨矣凡似中風小兒慢脾風與夫陰陽虛竭發熱吐血盜汗自汗氣虛眩暈氣虛痰熱血虛痿弱血虛目翳心虛驚悸肝虛癰瘰產后血暈胎前氣厥諸證之屬於虛者法當補益緊勿施用即如不得已欲借其開通關竅於一時亦宜少少用之勿令過劑甦省開通之後不可復用矣孕婦不宜佩帶勞怯人亦忌之李



廷飛云不可近鼻有白蟲入腦患癩久帶其香透關  
令人成異疾

牛黃味苦平有小毒主驚癇寒熱熱盛狂瘕除邪逐鬼  
療小兒百病諸癇熱口不開大人狂癲又墮胎久服輕

身增年令人不忘

人參為之使惡常  
山畏牛膝乾漆

疏○牛為土畜其性甘平惟食百草其精華凝結為  
黃猶人身之有內丹也故能解百毒而消痰熱散心  
火而療驚癇為世神物諸藥莫及也凡牛生黃則夜

視其身有光皮毛潤澤眼如血色益得氣之精而形質變化自有異也或云牛病乃生黃者非也本經味苦氣平別錄有小毒吳普云無毒然必無毒者為是入足厥陰少陽手少陰經其主小兒驚癇寒熱熱盛口不能開及大人癲狂癰瘰者皆肝心二經邪熱膠痰為病心熱則火自生焰肝熱則木自生風風火相搏故發如上等證此藥味苦氣涼入二經而能除熱消痰則風火息神魂清諸證自瘳矣鬼邪侵著因心

虛所致小兒百病多屬胎熱入心養神除熱解毒故  
悉主之也性善通竅故能墮胎善除熱益心故能令  
人不忘非久服多服之藥其云輕身延年者蓋指病  
去則身自輕安而得盡其天年也

主治參互

同犀角琥珀天竺黃鉤藤鉤朮神真珠金箔麝香丹  
砂治小兒驚癇百病 入外科內服藥能解疔腫癰  
疽毒並可入傳藥止痛散毒如神 同犀角生地黃

牡丹皮竹葉麥門冬治小兒五色丹毒 同鍾乳石

珍珠猪牙皂角象牙末白殭蠶紅鉛片腦明礬沒藥

蛀竹屑天靈蓋為丸土茯苓湯下治結毒有神 姚

和衆方小兒初生三日去驚邪辟惡氣以牛黃一豆

許以蜜少許研勻綿蘸令兒吮之一日令盡 外臺

秘要小兒七日口噤牛黃為末以淡竹瀝化一字灌

之更以猪乳滴之 錢氏小兒方初生胎熱或身體

黃者以真牛黃一豆大入蜜調膏乳汁化開時時滴

兒口中兼治腹痛夜啼 總微錄小兒熱驚或驚癇  
嚼舌迷悶仰目牛黃一杏仁大竹瀝薑汁各一合和  
勻與服 又方小兒積熱毛焦睡語欲發驚者牛黃  
六分硃砂五錢同研以犀角磨汁調服一錢 王氏  
痘癰方痘瘡黑陷牛黃二粒朱砂一分研末蜜浸臘  
脂取汁調搽并可內服

簡誤

牛黃治小兒百病之聖藥蓋小兒稟純陽之氣其病

皆胎毒痰熱所生肝心二經所發此藥能化痰除熱  
清心養肝有起死回生之力惟傷乳作瀉脾胃虛寒  
者不當用

熊脂味甘微寒微溫無毒主風痺不仁筋急五藏腹中  
積聚寒熱羸瘦頭瘍白禿面𤔔炮食飲吐嘔久服強志  
不饑輕身長年

疏○詩云惟熊惟羆男子之祥取其為陽獸而強力  
壯毅也本經味甘氣微寒別錄微溫無毒其主風痺

不仁筋急者蓋風為陽邪熊為陽獸其氣溫能通行經絡其性潤能滋養肝脾故主之也滑澤而通行故主五藏腹中積聚及食飲吐嘔甘寒而強力故能主寒熱羸瘦輕身性潤而疎風故能主頭瘍白禿面皯皯也久服強志不饑長年甚言其補虛壯筋骨之功耳熊掌乃八珍之一食之可禦風寒益氣力肉與脂同功河間云熊肉振羸是因其氣有餘以補不足者也

熊膽味苦寒無毒療時氣熱盛變為黃疸暑月久痢

疳蟲心痛怔忡

藥性論小兒五疳殺蟲治惡瘡

疏○熊膽氣味與象膽同其所主亦相似時氣熱盛變為黃疸熱邪在足太陰也久痢疳蟲濕熱在手陽明也心痛怔忡熱邪在手少陰也入三經而除熱邪故能療諸證也極苦而寒故又能殺蟲治惡瘡點痔

主治參互

齊東野語赤目障翳熊膽丸以膽少許化開入片腦



一二釐研勻點上絕妙 聖惠方小兒鼻蝕熊膽半  
分湯化抹之 外臺祕要十年痔瘡熊膽塗之神効  
一切方不及也或加入片腦少許以猪膽汁和塗亦  
妙 保幼大全諸疳羸瘦熊膽使君子末等分研勻  
瓷器蒸溶蒸餅丸麻子大每米飲下二十九

簡誤

凡膽皆極苦寒而能走肝膽二經瀉有餘之熱蓋以  
類相從也小兒疳積多致目内生翳障者以肝脾二

臟邪熱壅滯則二臟之氣血日虛閉塞日甚故也用  
此瀉肝膽脾家之熱則內邪清而外障去矣如不因  
疳證而目生翳障及痘後蒙閉者多因肝腎兩虛宜  
滋陰養血清熱為急諸膽皆不得用有痼疾者不可  
食熊肉令終身不愈

象牙無毒主諸鐵及雜物入肉刮取屑細研和水傅瘡  
上立出

疏○象牙本經無氣味日華子云平海藥云寒應是

甘寒無毒之物象性勇猛而牙善蛻故能出一切皮肉間有形滯物如經所言也又能治邪魅驚悸風癩及惡瘡拔毒長肉生肌去漏等用

主治參互

同明礬黃蠟牛角鰓鉛花金頭蜈蚣蝟皮猪懸蹄治通腸漏能去漏管 治楊梅結毒載牛黃條內 王氏痘癰方痘癰不收象牙屑銅銚炒黃紅色為末每服七八分白湯下 又方鍼箭入肉象牙末水和傅

之即出也 日華子治小便不通象牙生煎服之小便過多燒灰飲下

象膽主明目及治疳治瘡腫以水化塗之治口臭以綿裹少許貼牙根平旦漱去數度即瘥

疏○象膽苦寒之物也入肝脾二經肝熱則目不明脾家鬱熱則成疳積或口臭苦寒除二經之熱故能主諸證苦寒涼血解毒故又能主瘡腫也今世治疳證癆瘵傳屍多用之總取其苦寒能殺疳蟲癆蟲兼

除臟腑一切熱結也

主治參互

同獺肝蘆會乾漆胡黃連青黛鬼白丹砂入滋腎藥  
內治傳屍癆瘵 聖濟總錄內障目翳用象膽半兩  
鯉魚膽七枚熊膽一分牛膽半兩麝香一分石決明  
一兩為末糊丸菴豆大每茶下十九日二

象皮其性最易收斂人以鈎刺插入皮中拔出半日  
其瘡即合故入膏散為長肉合金瘡之要藥

簡誤

象膽苦寒之極不利脾胃凡疳證脾弱者目病血虛者咸不宜多服象牙及皮氣味和平於臟腑無迕故不著簡誤

白膠味甘平溫無毒主傷中勞絕腰痛羸瘦補中益氣婦人血閉無子止痛安胎療吐血下血崩中不止四肢酸疼多汗淋露折跌傷損久服輕身延年一名鹿角膠

得火良畏大黃

疏○白膠是熬鹿角而成故其味甘氣平別錄溫無  
毒氣薄味厚降多升少陽中之陰也入足厥陰少陰  
手少陰厥陰經經曰勞則喘且汗出內外皆越中氣  
耗矣故凡作勞之人中氣傷絕四肢作痛多汗或吐  
血下血皆肝心受病此藥味甘氣溫入二經而能補  
益中氣則絕傷和四肢利血自止汗自斂也折跌傷  
損則血瘀而成病甘溫入血通行又兼補益故折跌  
傷損自愈婦人血閉無子及崩中淋露胎痛不安腰

痛羸瘦者皆血虛肝腎不足之候溫肝補腎益血則  
諸證自退而胎自得所養也血氣生真陽足故久服  
能輕身延年耳更治尿血溺精瘡瘍腫毒及漏下赤  
白婦人久服能令有子

主治參互

同牛膝牡丹皮麥門冬地黃真蘇子鬱金白芍藥當  
歸童便續斷治勞傷吐血 同山茱萸枸杞子鹿茸  
地黃麥冬杜仲補骨脂懷山藥車前子五味子巴戟



天蓮鬚治腎虛陽痿精寒無子加入當歸紫石英治  
婦人血閉子宮冷服之受孕 外臺祕要虛勞尿精  
及尿血白膠二兩炙酒二升頓和溫服 肘后方妊  
娠卒下血以酒煮膠二兩消盡頓服

簡誤

鹿乃仙獸純陽之物也其治勞傷羸瘦益腎添精煖  
腰膝養血脈強筋骨助陽道之聖藥也然而腎虛有  
火者不宜用以其偏於補陽也上焦有痰熱及胃家

有火者不宜用以其性熱復膩滯難化也凡吐血下血係陰虛火熾者槩不得服

阿膠味甘平微溫無毒主心腹內崩勞極洒洒如瘡狀腰腹痛四肢酸疼女子下血安胎丈夫小腹虛勞羸瘦陰氣不足脚酸不能久立養肝氣久服輕身益氣一

名傳致膠

得火良薯蕷為之使畏大黃凡用以蛤粉炒或酒化成膏亦得

疏○阿膠舊云煮牛皮作之藏器與蘇頌皆云是烏

驢皮其說為的其功專在於水按阿井在山東兗州

府東阿縣乃濟水之伏者所注其水清而重其色正  
綠其性趨下而純陰與衆水大別本經味甘氣平別  
錄微溫無毒元素云性平味淡氣味俱薄可升可降  
陽中陰也入手太陰足少陰厥陰經其主女子下血  
腹內崩勞極洒洒如瘡狀腰腹痛四肢酸疼胎不安  
及丈夫少腹痛虛勞羸瘦陰氣不足脚酸不能久立  
等證皆由於精血虛肝腎不足法當補肝益血經曰  
精不足者補之以味味者陰也補精以陰求其屬也

此藥得水氣之陰具補陰之味俾入二經而得所養故能療如上諸證也血虛則肝無以養益陰補血故能養肝氣入肺腎補不足故又能益氣以肺主氣腎納氣也氣血兩足所以能輕身也今世以之療吐血衄血血淋尿血腸風下血血痢女子血氣痛血枯崩中帶下胎前產後諸疾及虛勞咳嗽肺痿肺癰膿血雜出等證神効者皆取其入肺入腎益陰滋水補血清熱之功也

主治參互

同天麥門冬枯樓根白藥子五味子桑白皮剪草生  
地黃枸杞子百部蘇子白芍藥治肺腎俱虛咳嗽吐  
血 同杜仲枸杞子白芍藥山藥麥門冬地黃黃耆  
人參青蒿續斷黃蘗治婦人崩中漏血 同白芍藥  
炙甘草麥冬地黃白膠當歸枸杞子杜仲續斷治婦  
人胎痛或胎漏下血 直指方老人虛秘阿膠炒二  
錢葱白三根水煎化入蜜二匙溫服 仲景方黃連

阿膠湯治少陰病得之二三日以上心中煩不得卧者用阿膠三兩黃連四兩黃芩一兩芍藥二兩雞子黃二枚以水五升先煮三物取二升去滓內膠烱盡小冷內雞子黃攪令相得溫服七合日三和劑局方治腸胃氣虛冷熱不調下痢赤白裏急後重腹痛小便不利用阿膠二兩炒黃連三兩茯苓二兩為末搗丸梧子大每服五十丸米湯下日三千金翼吐血不止阿膠炒二兩蒲黃六合生地黄三兩水五升

煮三升分服兼治衄血 梅師方妊娠下血不止阿  
膠三兩炙為末酒一升煎化服即愈 產寶方膠艾  
湯妊娠胎動阿膠艾葉各二兩葱白一升水四升煮  
一升分服

簡誤

此藥多偽造皆雜以牛馬皮舊革鞍靴之類其氣濁  
穢不堪入藥當以光如堅漆色帶油綠者為真真者  
折之即斷亦不作臭氣夏月亦不甚濕軟如入調經

丸藥中宜入醋重湯頓化和藥其氣味雖和平然性黏膩胃弱作嘔吐者勿服脾虛食不消者亦忌之

牛乳微寒補虛羸止渴

乳腐味甘微寒無毒主潤五藏利大小便益十二經脈  
疏○牛乳乃牛之血液所化其味甘其氣微寒無毒  
甘寒能養血脈滋潤五藏故主補虛羸止渴及乳腐  
所主皆同也日華子主養心肺解熱毒潤皮膚者亦  
此意耳肝味苦甘氣和平食之能補肝治雀盲



主治參互

同人乳羊乳梨汁蘆根汁蔗漿熬膏治反胃噎膈大便燥結宜時時飲之兼能止消渴

夏子益奇疾方肉人怪病人頂生瘡五色如櫻桃狀破則自頂分裂連皮剝脫至足名曰肉人常飲牛乳自消

簡誤

患冷氣人忌之與酸物相反令人腹中癥結脾胃作

泄者亦不得服

酥微寒補五藏利大腸主口瘡

疏○酥乃牛乳所出乳之精華也其味甘氣微寒無  
毒性滑澤五臟皆屬陰酥乃陰血之精華故能補五  
藏血枯火盛大腸燥結及口舌生瘡甘寒除熱補血  
故主利大腸口瘡也 按酥酪醍醐總成於牛乳但  
有精粗之別耳其性大抵皆滋潤滑澤宜於血熱枯  
燥之人其功不甚相遠故二物不復載

主治參互

凡一切藥用酥炙者取其潤燥兼能益精髓補血脈  
又有滲入骨肉使骨易糜之功 外臺祕要一切肺  
病咳嗽膿血不止用好酥五十斤煉三遍當出醍醐  
每服一合日三服以瘥為度神効

簡誤

性能利竅驟食之使人遺精

神農本草經疏卷十六

欽定四庫全書

神農本草經疏卷十七

明 繆希雍 撰

獸部中品

總十七種今疏其要者九種

白馬莖

尿溺附

鹿茸

角髓腎肉附

牛角鰓

膽肉附

羖羊角

肝腎肉血附

狗陰莖

頭骨血肉附

羚羊角

犀角

虎骨

兔頭骨

腦肝肉附

白馬莖味鹹甘平無毒主傷中脈絕陰不起強志益氣  
長肌肉肥健生子小兒驚癇陰乾百日用

疏○馬火畜也其陰莖又純陽之物也故能主男子  
陰痿堅強房中藥多用之本經味鹹氣平別錄甘無  
毒察其功用氣平應作溫非甘溫則不主傷中脈絕  
以甘能補血脈溫能通經絡故耳陽衰則陰不起而  
生長之道絕鹹溫走下焦補助真陽則陰自起精自  
煖故能令人有子也氣屬陽陽得補故能益氣腎藏

志腎氣足故能強志甘溫補血脈而助真氣故又能  
長肌肉肥健也別錄又主小兒驚癇者似非其所長  
應是誤入耳凡收當取銀色無病白馬春月游牝時  
力勢正強者生取陰乾百日用時以銅刀切片將生  
羊血拌蒸半日去血晒乾剉用

主治參互

得肉從蓉巴戟天山茱萸兔絲子真陽起石人參鹿  
茸狗陰莖作丸治真陽虛脫陰痿不起下元冷憊等

證

簡誤

馬陰莖乃純陽之物也凡陰虛火盛者不得服人但喜其溫煖滋助陽道少年多慾者房中術用之仗其力勢恣欲無節以致損竭真陰多成勞瘵不可不戒也

馬通微溫主婦人崩中止渴及吐下血鼻衄金瘡止血



疏○白馬通本經雖云微溫然必是苦而涼者也惟其苦涼所以能療諸血熱證止渴及孟詵主陰陽易垂死者絞汁服也

白馬溺味辛微寒主消渴破癥堅積聚男子伏梁積疝婦人瘕疾銅器盛飲之

疏○白馬溺昔有人與其奴皆患心腹痛病奴死剖之得一白鼈赤眼仍活以諸藥納口中終不死有人乘白馬觀之馬尿墮鼈而鼈縮遂以灌之即化成水

其人乃服之疾亦愈觀其氣味不應有如是之功乃知物性畏忌各有所制如刀柄之刈三稜而化為水正以遇其所制之物故也本經云氣微寒然詳其用必是微溫味應帶鹹辛鹹溫具足所以能療經所言諸證

主治參互

千金方食髮成瘕咽中如有蟲上下者白馬尿飲之佳  
鮑氏方利骨取牙白馬尿浸茄稗三日炒為末

點牙即落

簡誤

無積聚癥瘕者不得服胸中虛痞誤作伏梁服之有損

鹿茸味甘酸溫微溫無毒主漏下惡血寒熱驚癇益氣  
強志生齒不老療虛勞洒洒如瘡羸瘦四肢酸疼腰脊  
痛小便便利洩精溺血破留血在腹散石淋癰腫骨中熱

疽瘡

瘡應作瘍

凡用取形如分岐馬鞍茸端如瑪瑙  
紅玉破之肌如朽木者最良先以酥薄塗勻於烈

炎中燎去

毛再灸

疏○鹿茸稟純陽之質含生發之氣故其味甘氣溫  
別錄言酸微溫氣薄味厚陰中之陽也入手厥陰少  
陰足少陰厥陰經婦人衝任脈虛則為漏下惡血或  
瘀血在腹或為石淋男子肝腎不足則為寒熱驚癇  
或虛勞洒洒如瘧或羸瘦四肢酸疼腰脊痛或小便  
數利洩精溺血此藥走命門心包絡及腎肝之陰分  
補下元真陽故能主如上諸證及益氣強志生齒不

老也癰腫疽瘍皆榮氣不從所致甘溫能通血脈和  
腠理故亦主之日華子主補男子腰腎虛冷脚膝無  
力夜夢鬼交精溢自出女人崩中漏血赤白帶下灸  
末空心酒服方寸匕

主治參互

同牛膝杜仲地黃山茱萸補骨脂巴戟天山藥肉蓯  
蓉兔絲子治腎虛腰痛及陰痿不起 澹寮方班龍  
丸治諸虛用鹿茸酥炙鹿角膠炒成珠鹿角霜陽起

石煨紅醋淬肉從容酒浸酸棗仁柏子仁黃耆各一  
兩地黃丸蒸八錢朱砂半錢各為末酒糊丸梧子大  
每空心酒下五十九昔西蜀市中有一道人貨之一  
名茸珠丹每醉高歌曰尾閭不禁滄海竭九轉靈丹  
都漫說惟有班龍頂上珠能補玉堂闕下穴朝野遍  
傳之即此方也 普濟方鹿茸酒治陽事虛痿小便  
頻數面色無光用嫩鹿茸一兩去毛切片山藥末一  
兩絹袋裏置酒甕中七日後開甕日飲三盃將茸焙

乾作丸服 本事方陰虛腰痛不能反側鹿茸兔絲

子各一兩茴香半兩為末以羊腎二對和酒煮爛搗

如泥和丸梧子大陰乾每服三五十丸酒下日三服

濟生方室女白帶因衝任虛寒者鹿茸酒蒸焙二

兩金毛狗脊白斂各一兩為末用艾煎醋打米糊丸

梧子大每酒下五十丸日二服 簡誤同白膠

鹿角味鹹無毒主惡瘡癰腫逐邪惡氣留血在陰中

除小腹血急痛腰脊痛折傷惡血益氣

杜仲為之使

疏○鹿山獸屬陽夏至解角者陰生陽退之象也麋澤獸屬陰冬至解角者陽生陰退之象也是以麋茸補陰鹿茸補陽角亦如之凡角初生軟嫩者為茸稟壯健之性故能峻補腎家真陽之氣熬成白膠則氣味甘緩能通周身之血脈生角則味鹹氣溫惟散熱行血消腫辟惡氣而已鹹能入血軟堅溫能通行散邪故主惡瘡癰腫逐邪惡氣及留血在陰中少腹血急痛折傷惡血等證也肝腎虛則為腰脊痛鹹溫入



腎補肝故主腰脊痛氣屬陽補陽故又能益氣也日  
華子云水磨服治脫精尿血夜夢鬼交醋磨汁塗瘡  
瘍癰腫熱毒火炙熱熨小兒重舌驚口瘡孟詵云蜜  
炙研末酒服輕身強骨髓補陽道絕傷又治婦人夢  
與鬼交者酒服一撮即出鬼精燒灰治女子胞中餘  
血不盡欲死者悉取其入血行血散熱消腫補陽辟  
邪之意也

主治參互

濟生方骨虛勞極面腫垢黑脊痛不能久立血氣衰  
憊髮落齒槁甚則喜唾用鹿角屑二兩牛膝一兩半  
為末煉蜜丸梧子大每服五十丸空心鹽湯下 肘  
後方腎虛腰痛如錐刺不能動搖鹿角屑三兩炒黃  
研末空心溫酒服方寸匕日三 子母祕錄產後腹  
痛瘀血不盡者鹿角燒研豉汁服方寸匕日三并治  
產後血暈 千金方蹉跌損傷血瘀骨痛鹿角末酒  
服方寸匕 瀕湖方癰癰腫痛毒鹿角尖磨濃汁塗

之

簡誤

無瘀血停留者不得服陽盛陰虛者忌之胃火齒痛亦不宜服

髓味甘溫主丈夫女子傷中絕脈筋急痛欬逆以酒和服之良

疏○髓者精血之純懿內充以實骨者也鹿稟純陽故其髓味甘氣溫性能補血而潤燥所以主一切血

脈不和如傷中脈絕筋急痛及欬逆也日華子同蜜  
黃服壯陽道令人有子同地黃汁煎膏服填骨髓壯  
筋骨治嘔吐者亦此意也

腎平主補腎氣

疏○鹿性淫一牡常御百牝腎氣有餘故也故服之  
能壯陽道補腎家不足

鹿肉甘溫補中強五臟益氣力生者療口僻割薄之  
疏○鹿所食多芳草其性質芳潔氣味醇和故其肉

味甘氣溫無毒與他肉不同也性能益脾胃通血脈  
故主補中強五臟益氣力也生者療中風口僻亦取  
其有通血脈之功血脈通則口僻自正也

牛角鰓下閉血瘀血疼痛女人帶下燔之味苦無毒

疏○牛角鰓乃角中嫩骨也為筋之粹骨之餘入足  
厥陰少陰血分之藥兼入手陽明經苦能泄溫能通  
行故主婦人帶下及閉血瘀血疼痛也

主治參互

同猪懸蹄猬皮金頭蜈蚣蛙竹屑明礬白蠟去漏管  
近效方大便下血黃牛角鰓一具煨末煮豉湯服  
二錢日三塞上方鼠瘻痔疾牛角鰓燒灰酒服方  
寸七

膽味苦大寒無毒除心腹熱渴利口焦燥益目精可  
丸藥

疏○膽牛食百草其精華萃於膽其味苦其氣大寒  
無毒經云寒以勝熱苦以泄結故主心腹熱及渴利

口焦燥也肝開竅於目肝熱則目睛不明入肝泄熱故益目精也近世以南星末釀入陰乾治驚風有奇功者取其苦寒製南星之燥俾善於豁痰除熱耳

簡誤

脾胃虛寒者忌之目病非風熱者不宜用

牛肉味甘平無毒主安中益氣養脾胃

疏○牛土畜也黃中央正色也經云中央色黃入通於脾故為益脾胃之藥脾胃得所養則中自安氣自

益矣丹溪朱氏有倒倉法非為其有吐下之力也特飲之既滿或上湧下泄爾此蓋借其補以為瀉故積聚去而腸胃得所養亦奇法也但病非關腸胃者不宜服凡牛病死及黑身白頭獨肝者皆不宜服合猪肉及黍米酒食竝生寸白蟲合韭薤食令人熱病合生薑食損齒又云牛乃稼穡之資不可多殺及食若以之療病則藥物甚多以之供饌核則肥甘不少似可無此一物也好生君子其念及而力戒之當有冥



福耳

殺羊角味鹹苦溫微寒無毒主青盲明目殺疥蟲止寒  
洩辟惡鬼虎狼止驚悸療百節中結氣風頭痛及蟲毒  
吐血婦人產後餘痛久服安心益氣輕身取之時勿中  
濕濕即有毒

疏○羊角乃肺肝心三經藥也而入肝為正本經鹹  
溫別錄苦微寒甄權大寒察其功用應是苦寒居多  
非苦寒則不能主青盲驚悸殺疥蟲及風頭痛蠱毒

吐血也蓋青盲肝熱也驚悸心熱也疥蟲濕熱也風頭痛火熱上升也蠱毒吐血熱毒傷血也苦寒總除諸熱故能療如上等證也驚悸平則心自安熱傷氣熱除則氣自益其主百節中結氣與婦人產後餘痛亦指血熱氣壅者而言本經又主止寒洩及辟惡鬼虎狼未解其義俟博物者詳之

主治參互

子母祕錄產後寒熱心悶脹極百病殺羊角燒末酒

服方寸匕 普濟方治小兒癇疾方同上

羊腎補腎氣益精髓

疏○羊腎補腎氣者以其類相從借其氣以補其不足也腎得補則精髓自益矣

主治參互

羊腎一對去脂切肉從容一兩酒浸一夕去皮膜和作羹加五味食治勞傷陽虛無力

羊肉味甘大熱無毒主緩中字乳餘疾及頭腦大風

汗出虛勞寒冷補中益氣安心止驚

反半夏  
菖蒲

疏○羊得火土之氣以生故其味甘氣大熱無毒素  
問言苦亦以其性熱屬火耳李杲云補可去弱人參  
羊肉之屬是已羊肉有形凡形氣痿弱虛羸不足者  
宜之其主字乳餘疾者蓋產後大虛血氣暴損得甘  
熱之物補助陽氣則陰血自長餘疾自除矣中氣虛  
則心不安或驚惕陽氣弱則頭腦大風汗出補中則  
中自緩故能安心止驚益氣則陽自足故能療頭腦

大風汗出及虛勞寒冷也

主治參互

金匱要略羊肉湯治寒勞虛羸及產後心腹疝痛用  
肥羊肉一斤水一斗煮汁八升入當歸五兩黃耆八  
兩生薑六兩煮取二升分四服 又方產後虛羸腹  
痛冷氣不調及腦中風汗自出白羊肉一斤治如常  
調和食之

飲膳正要壯胃健脾羊肉三斤切梁米二升同煮下

五味作粥食 千金方損傷青腫用新羊肉貼之

簡誤

羊肉味甘大熱脾胃虛寒羸瘦氣乏者宜之然天行  
熱病後溫瘧熱痢後食之必致發熱難療妊婦食之  
令子多熱與夫癰腫瘡瘍消渴吐血嘈雜易饑等證  
咸不宜服又銅器煮食之男子損陽女子暴下物性  
之異如此不可不知也

羊肝性冷療肝風虛熱目赤暗無所見生食子肝七

枚神効或切薄片水浸傳之

疏○羊肝補肝以類相從肝開竅於目肝熱則目赤痛失明補肝除熱所以能明目及治諸目疾也

主治叅誤

醫鏡翳膜羞明有淚肝經有熱也用青羊子肝一具竹刀切和黃連四兩為丸梧子大食遠茶清下七十丸日三服忌鐵器猪肉冷水

羊血主女人中風血虛悶產後血暈悶欲絕者生飲

一升即活

疏○血為水化故其味應鹹氣平無毒女人以血為主血熱則生風血虛則悶絕鹹平能補血涼血故主女人血虛中風及產後血悶欲絕也性能解丹石毒如丹砂水銀汞粉生銀礪砂砒霜硫黃鍾乳礬石陽起石等類凡覺毒發刺飲一升即解凡服地黃何首烏諸補藥者須忌之

牡狗陰莖味鹹平無毒主傷中陰痿不起令強熱大生



子除女子帶下十二疾一名狗精六月上伏取陰乾百

日

疏○狗陰莖氣味與馬陰莖同其所主亦相似性專  
補右腎命門真火故能令陽道豐隆精煖盈溢使人  
生子也女子帶下十二疾皆衝任虛寒所致鹹溫入  
下焦補煖二脈故亦主之也

主治參互

同兔絲子覆盆子魚膠車前子巴戟天肉蓯蓉鹿茸

沙苑蒺藜山茱萸能益陽煖精使人有子

簡誤

陽事易舉者忌之內熱多火者勿服

頭骨主金瘡止血

燒灰用黃狗者良餘骨燒灰生肌敷馬瘡及療諸瘡癰妬乳癰腫

疏○狗頭骨本經無氣味察其功用應是甘鹹溫之物鹹能入血甘能補血溫能和血故主金瘡止血也

主治參互

同血竭乳香沒藥蚬蛇膽麝蟲天靈蓋自然銅治跌

撲損傷有神臨杖時服之護心止痛杖後服之生肌  
長肉 千金方治小兒久痢狗頭骨燒灰白湯服非  
久痢虛寒者勿用 利濟局方狗頭骨丸治久痢臍  
腹疼痛所下雜色晝夜不止或其人久虛所下腸垢  
謂之惡痢竝能治之赤石脂乾薑各半兩肉豆蔻煨  
附子炮去皮各一兩狗頭骨灰一兩為末醋和丸如  
桐子大每服六七十丸空心米飲下非陰臟人及陽  
虛極者不宜用 聖惠方赤白帶下不止者狗頭骨

燒存性為末每酒服一錢日三 經驗方產後血不

定奔四肢以狗頭骨灰酒服二錢甚效 衛生易簡

方打損接骨狗頭骨灰熱醋調塗傷處暖卧 壽域

方惡瘡不愈狗頭骨灰黃丹等分敷之 同白斂等

分為末生白酒調服五錢治少腹癰有神

白狗血味鹹無毒主癰疾發作

疏○癰疾屬手少陰少陰主血藏神血虛而神自不

寧故發是證此物入心補血以類相從故主癰疾發

作也

簡誤

犬性熱以其稟火土之氣故助陽陽勝則發熱動火  
生痰發渴凡病人陰虛內熱多痰多火者慎勿食之  
天行病後尤為大忌治痢亦非所宜

肉味鹹酸溫主安五藏補絕傷輕身益氣

疏○犬火畜也其味鹹酸氣溫無毒乃脾胃家肉也  
五臟皆賴脾胃以養脾胃得補故主安五臟五臟安

而身自輕氣自益絕傷自補矣日華子主補胃氣壯陽道暖腰膝益氣力孟詵主補五勞七傷益陽事補血脈厚腸胃實下焦填骨髓者皆取其溫煖脾胃之功則氣血生長腰腎受庇陽道壯健而下焦煖也

主治參互

乾坤祕韞戊戌丸治男子婦人一應諸虛不足大補元氣用黃童子狗一隻去皮毛肚腸同外腎於砂鍋內以酒酢八分水二升入地骨皮一斤肉蓯蓉各半

斤同煮一日去藥再煮一夜去骨再煮肉如泥搗細  
入當歸末四兩蓮肉蒼朮末各一斤山藥兔絲子末  
各十兩甘草末八兩和杵千下丸梧子大每空心酒  
下六七十九 危氏方痔漏有蟲用熟犬肉蘸藍汁  
空心食七日効

簡誤

氣壯多火陰虛之人不宜食凡犬肉不可炙食令人  
消渴妊婦食之令子無聲熱病後食之殺人道家以

犬為地厭忌物

羚羊角味鹹苦寒微寒無毒主明目益氣起陰去惡血  
注下辟蠱毒惡鬼不祥安心氣常不魘寐療傷寒時氣  
寒熱熱在肌膚溫風注毒伏在骨間除邪氣驚夢狂越  
僻謬及食噎不通久服強筋骨輕身起陰益氣利丈夫  
疏○羊火畜也而羚羊則屬木本經味鹹氣寒別錄  
苦微寒無毒氣薄味厚陽中之陰降也入手太陰少  
陰足厥陰經少陰為君主之官虛則神明不守外邪



易侵或蟲毒惡鬼不祥或邪氣魘寐驚夢狂越僻謬  
羚羊性靈能通神靈逐邪氣心得所養而諸證除矣  
其主傷寒時氣寒熱熱在肌膚溫風注毒伏在骨間  
者皆厥陰為病厥陰為風木之位風熱外邪傷於是  
經故見諸證入肝散邪則諸證自除經曰壯火食氣  
又曰熱則骨消筋緩火熱太甚則陰反不能起而筋  
骨軟鹹寒入下焦除邪熱則陰自起氣自益筋骨強  
身自輕也肝熱則目不明肝藏血熱傷血則惡血注

下肝在志為怒病則煩滿氣逆噎塞不通苦寒能涼  
血熱下降能平逆氣肝氣和而諸證無不瘳矣

主治叅互

同犀角丹砂牛黃琥珀天竺黃金箔茯神遠志鉤藤  
鉤竹瀝治驚邪魘寐及癲癇狂亂等疾 同枸杞子  
甘菊花決明子穀精草生地黃五味子黃蘗蜜蒙花  
木賊草女貞實治肝腎虛而有熱以致目昏生翳  
外臺祕要噎塞不通羚羊角為細末飲服方寸匕

千金方產後煩悶汗出不識人羚羊角燒末東流水服方寸匕未愈再服

簡誤

凡肝心二經虛而有熱者宜之虛而無熱者不宜用凡用有神羊角甚長有二十四節挂痕甚明內有天生木胎此角有神力抵千牛入藥不可單用須要不拆元對繩縛鐵銼銼細末盡處須重重密裹恐力散也避風搗篩極細更研萬匝如飛塵後入藥免刮人

腸

犀角味苦酸鹹寒微寒無毒主百毒蠱瘕邪鬼瘴氣殺

鉤吻鴆羽蛇毒除邪不迷惑魘寐療傷寒溫疫頭痛寒

熱諸毒氣久服輕身駿健

升麻松脂為之使惡烏頭忌鹽凡欲作末先鋸屑置人懷

中一宿搗之應手成粉

疏○犀亦神獸也故其角之精者名通天夜視有光

能開水辟邪禽獸見之皆驚駭辟易本經味苦氣寒

無毒別錄酸鹹微寒李珣大寒味厚於氣可升可降

陽中之陰也入足陽明兼入手少陰經陽明為水穀  
之海無物不受又口鼻為上下陽明之竅邪氣多從  
口鼻而入凡蠱毒鬼瘴與夫風火邪熱氣之侵人也  
必先入於是經犀角為陽明經正藥其性神靈而寒  
故能除邪鬼省魘寐其味苦寒能散邪熱解諸毒故  
主百毒蠱症瘴氣殺鉤吻鴆羽蛇毒及傷寒溫疫頭  
痛寒熱等證也邪熱去則心經清明人自不迷惑胃  
亦遂安而五臟皆得所養故能令人駿健及久服輕

身也藥性論主鎮心神解大熱散風毒治發背癰疽  
瘡腫療時疾熱如火煩毒入心狂言妄語日華子治  
心闕止驚鎮肝明目海藥主風毒攻心耗耗熱悶小  
兒麩豆風熱驚癇孟詵主中惡心痛中飲食藥毒心  
風煩悶中風失音及今人用治吐血衄血下血傷寒  
畜血發狂譫語發黃發斑痘瘡稠密熱極黑陷等證  
神効皆取其入胃入心散邪清熱涼血解毒之功耳

主治參互

同鬼白麝香龍齒茯神蘇合香沈水香天靈蓋丹砂  
雄黃能辟鬼疰邪氣 同丹砂琥珀金箔天竺黃牛  
黃鈎藤鈎羚羊角珍珠麝香治大人小兒風熱驚癇  
磨汁同生地黃紅花子麥門冬紫草白芍藥鼠黏  
子治痘瘡血熱初見點紅豔壯熱口渴煩躁狂語多  
服可保無虞 磨汁同鬱金童便生地黃麥門冬炙  
甘草白芍藥紫蘇子剪草丹參白藥子治吐血衄血  
犀角地黃湯治傷寒畜血發黃或熱盛吐血 入

紫雪丸治大人小兒顛狂溫疫蠱毒邪魅一切煩熱  
為病 入抱龍丸治小兒恍惚驚悸痰涎壅塞 入

至寶丹治中風不語中惡氣絕一切神魂恍惚癲狂  
擾亂等證 聖濟總錄吐血不止似鵝鴨肝用生犀  
角桔梗各一兩為末每酒服二錢 廣利方治小兒  
驚癇不知人嚼舌仰目者犀角磨濃汁服之立効

錢氏小兒方痘瘡稠密生犀角於澀器中新汲水磨  
濃汁冷飲之 千金方療疽毒瘡喜著十指狀如代



指根深至肌能壞筋骨毒氣入藏殺人宜燒鐵烙之  
或炙百壯日飲犀角汁瘥 聖惠方下利鮮血犀角  
地榆金銀花各一兩升麻五錢為末煉蜜丸彈子大  
每服一丸水一升煎五合去滓溫服此熱毒伏於心  
經故也宜加丹砂滑石末以金銀藤花熬汁煎藥更  
効

簡誤

痘瘡氣虛無大熱者不宜用傷寒陰證發躁因陰寒

在內逼其浮陽失守之火聚於胸中上衝咽嗑故面赤手溫煩嘔喜飲涼物食下良久復吐出惟脈沈細足冷雖渴而飲水不多且復吐出為異於陽證耳不宜誤用犀角涼劑妊婦勿多服能消胎氣

虎骨主除邪惡氣殺鬼疰毒止驚悸主惡瘡鼠瘻頭骨尤良

疏○虎西方之獸山獸之君屬金而性最有力語云風從虎者風木也虎金也木受金制焉得不從故虎

嘯而風生自然之道也所以能治風病攣急屈伸不  
便走疰骨節風毒驚癇癰疾等證其性雖死而脛猶  
矻立不仆故脛骨治脚膝無力及手足諸風多効取  
以類相從借其氣有餘以補不足也本經無氣味藥  
性論云味辛微熱無毒稟勇猛之氣其味更辛散而  
通行故主辟邪惡氣殺鬼疰毒止驚悸也惡瘡鼠瘻  
亦風邪浸淫所致消散風邪則惡瘡鼠瘻自除矣

主治參互

同牛膝木瓜地黃山藥山茱萸黃藥枸杞子麥門冬  
五味子治腰脚無力筋骨疼痛或痿弱不能步履

同草薢獨活防己蒼朮牛膝何首烏薏苡仁木瓜刺  
蒺藜治風寒溼邪著於經絡以致偏痺不仁 同當

歸白芍藥炙甘草續斷牛膝白膠麥門冬地黃治遍  
身骨節痛 永類鈴方健忘驚悸預知散用虎骨酥  
炙白龍骨遠志等分為末每服三錢生薑湯下日三  
久則令人聰慧 李絳兵部手集虎骨治臂脛疼痛

不計深淺皆効用虎脰骨二兩酥炙碎羚羊角屑一兩芍藥二兩切以無灰酒浸之養至七日秋冬倍之每日空腹飲一盃若要速服即入磁銀器中以火煖養二三日即可服也 聖濟總錄歷節痛風虎脰骨炙三兩沒藥七錢為末每服二錢溫酒下日三小 品方惡犬咬傷虎骨刮末水服并傳之

簡誤

凡血不足以養筋以致筋骨疼痛者宜少用

兔頭骨平無毒主頭眩痛癰疾 腦主塗凍瘡肝主目暗 肉味辛平無毒主補中益氣

疏○兔屬金得太陰之精故其性喜望月兔至秋深時可食者金氣也其肉味辛氣平無毒然詳其用味應有甘氣應作涼經曰裏不足者以甘補之又曰熱傷氣味甘而氣涼所以能補中益氣也肝為風木之位太過則搖動撼物兔屬金而頭骨在上尤得氣之全故能平木邪療頭眩痛癰疾也肝開竅於目兔

目不瞬而瞭然其肝氣足也故能主目暗河間云兔  
肝明目因其氣有餘以補不足也腦為髓之至精性  
溫而滑潤故主塗凍瘡皸裂及世人用為催生利胎  
之聖藥也血味鹹寒能涼血活血解胎中熱毒亦能  
催生易產屎一名明月砂明目治目中翳膜勞瘵五  
疳痔瘻殺蟲解毒

主治參互

博濟方催生散用臘月兔腦攤紙上夾勻陰乾剪作

符子於面上書生字一箇候產母痛極時用釵股夾  
定燈上燒灰煎丁香酒調下 和劑局方催生丹麝  
香乳香母丁香為末臘月兔腦和丸如芡實大陰乾  
密封每一丸溫水下即時產下隨男女左右手中握  
藥丸是驗 劉氏保壽堂方兔血丸小兒服之終身  
不出痘瘡即出亦稀少臘月八日取生兔一隻刺血  
和蕎麥麪少加丹砂雄黃四五分候乾丸菜豆大初  
生小兒以乳汁化下二三丸遍身發出紅點是其徵



驗也但兒長成常以免肉啖之尤妙 蘭氏經驗方  
痘後目瞤直往山中東西地上不許回顧尋兔屎二  
七粒以雌雄檳榔各一箇同磨不落地井水調服百  
無一失其效如神

簡誤

妊娠不宜食兔肉令子缺唇且能致產不順性寒屬  
陰陽虛無熱者不宜服多服則損元氣痿陽事不宜  
合白雞獺肉薑橘芥同食八月至十月可食餘月傷

人神氣

神農本草經疏卷十七

欽定四庫全書

神農本草經疏卷十八

明 繆希雍 撰

獸部下品

總二十一種今疏其要者四種

猪懸蹄

足腎膽膚肚  
肪膏脰附

麋角

茸附

獺肝

脛肭臍

猪懸蹄主五痔伏熱在腸腸癰內蝕

疏○猪水畜也在辰屬亥在卦屬坎其肉氣味雖寒然而多食令人暴肥性能作濕生痰易惹風熱殊無利益耳其懸蹄乃蹄甲之懸起不著地者本經無氣味然為鹹寒無毒之物入手足陽明經藥也濕熱下注則為五痔內蝕熱壅血滯則為腸癰鹹寒能除腸胃之熱故主之也

主治參互

得牛角鯢槐角子猬皮象牙末金頭蜈蚣蛙竹屑明

礬地榆青黛白蠟治通腸漏令漏管自出 錢氏小兒方痘後目翳半年已上者一月取効用猪懸蹄三兩瓦瓶固濟煨蟬蛻一兩羚羊角三錢為末每歲一字三歲已上三錢溫水服日三

猪四足小寒主傷撻諸敗瘡下乳汁

疏○乳屬陽明陽明脈弱則乳汁不通能益陽明經氣血故能下乳傷撻敗瘡必血熱作痛氣寒而味甘鹹故涼血止痛也又煮湯為洗潰瘍之要藥

主治參互

廣濟方婦人乳無汁者以猪蹄四枚水二斗煮一斗  
去蹄入土瓜根通草漏蘆各三兩再煮六升去滓內  
葱白豉作粥或羹食之身體微熱有少汗出佳未通  
再作 梅師方癰疽發背乳發初起母猪蹄一隻通  
草六分綿裹煮羹食之 外科精要洗癰疽有猪蹄  
湯

腎冷和理腎氣通利膀胱

疏○猪腎味鹹氣冷能瀉腎氣腎虛寒者不宜食本  
經主理腎氣乃借其同氣以引導之耳不言補而言  
理其意有在矣腎與膀胱為表裏故復能利膀胱也  
今人誤認以為補腎恣意食之大為差謬不覩日華  
子云久食令人無子孟詵云久食令人傷腎其非補  
腎之物明矣

膽主傷寒熱渴

疏○膽味苦氣寒經曰熱淫於內寒以勝之苦以泄

之故主傷寒熱渴也

主治參互

仲景膽導法以猪膽汁和醋少許灌穀道中通大便  
神効入猪牙皂角細末二分攪勻更速益酸苦益陰  
潤燥而瀉便也 又治少陰下利不止厥逆無脈乾  
嘔煩者以白通湯加猪膽汁主之使其氣相從無拒  
格之患此寒因熱用熱因寒用之義也葱白四莖乾  
薑一兩生附子一枚水三升煮一升八人尿五合猪



膽汁一合分服 入雄黃末三四分蜈蚣末二分套  
指縛緊治天蛇毒有效 梅師方熱病蠱蝕上下用  
猪膽汁一枚醋一合煎沸服蟲立死 外臺祕要湯  
火傷瘡猪膽調黃蘗末塗之

膚仲景治足少陰下利咽痛胸滿心煩者有猪膚湯  
用猪膚一斤水一斗煮五升取汁入白蜜一升白粉  
五合熬香分服成無已註云猪水畜也其氣先入腎  
解少陰客熱加白蜜以潤燥除煩白粉以益氣斷利

也

肚主補中益氣止渴利

疏○猪肚屬土故其味必甘氣微溫無毒乃猪一自  
無害之物為補脾胃之要品脾胃得補則中氣益利  
自止矣日華子主補虛損蘇頌主骨蒸勞熱血脈不  
行皆取其補益脾胃則精血自生虛勞自愈根本固  
而五臟皆安也

主治參互

普濟方水瀉不止用猪肚一枚煮爛入平胃散搗丸服効 仲景方猪肚黃連丸治消渴用雄猪肚一枚入黃連末五兩枳樓根白梁米各四兩知母三兩麥門冬二兩縫定蒸熟搗丸梧子大每服三十丸米飲下 千金方溫養胎氣胎至九月消息用猪肚一枚如常著五味煮食至盡 又猪肚丸黃連一味為細末量肚大小實之煮令極爛搗勻為丸梧子大治臟毒下血 又方治腹脹大用烏芋去皮入雄肚線縫

砂器煮糜食之勿入鹽

肪膏主煎諸膏藥解班猫荒青毒

疏○肪膏即脂油也味甘寒性滑澤能涼血解毒潤燥故主煎諸膏藥及解班猫荒青毒也又能利腸胃通大小便能散風熱療惡瘡

主治叅互

肘後方膏髮煎治女勞黃疸見髮髮條兼能治五疸  
萬氏方肺熱暴瘡猪脂油一斤煉過入白蜜一斤

再煉少頃瀉淨冷定不時挑服一匙即愈

脛一名腎脂生兩腎中間似脂非脂似肉非肉乃人  
物之命門三焦發原處也陳藏器主肺痿咳嗽和棗  
肉浸酒服亦能主疰癖羸瘦蘇頌主肺氣乾脹喘急  
潤五藏去皴皸黥點等證蓋是甘寒滑澤之物甘寒  
則津液生滑澤則垢膩去故主如上諸證也男子多  
食損陽薄大腸其能專在去垢膩可用以浣垢衣俗  
名猪胰子

按猪為食味中常用之物臟腑腸胃咸無棄焉然其  
一身除肚膏外餘皆有毒發病人習之而不察也壯  
實者或暫食無害有疾者不可不知其忌故列其害  
於後 肉多食令人虛肥生痰熱熱病後食之復發  
不宜與薑同食食則發大風病 頭肉有病者食之  
生風發疾 腦食之損男子陽道臨房不能行事酒  
後尤不可食 血能敗血損陽服地黃何首烏諸補  
藥者尤忌之多食耗心氣不可合吳茱萸食 肝餌

藥人不可食合魚鱠食生癰疽合鯉魚腸子食傷人  
神延壽書云猪臨宰驚氣入心絕氣歸肝俱不可多  
食必傷人 脾孫思邈云凡六畜脾人一生莫食之  
肺不可與白花菜合食令人氣滯發霍亂八月和  
飴食至冬發疽 腎久食令人傷腎少子冬月不可  
食損人真氣兼發虛壅 脬男子多食損陽 腸多  
食動冷氣 鼻唇多食動風 舌多食損心  
麋角甘無毒主痺止血益氣力

疏○麋屬陰好遊澤畔其角冬至解者陽長則陰消之義也為補左腎真陰不足虛損勞乏筋骨腰膝酸痛一切血液衰少為病故主止血益氣力及除痺也痺雖風寒濕合而成疾然外邪易入者由氣血先虛經絡因之壅滯血脈不通故也麋角入血益陰榮養經絡故主之也茸功用相同而補陰之力更勝

主治參互

千金方麋角丸補心神安五臟填骨髓理腰脚能久



立聰明耳目髮白更黑返老還少麋角取當年新角  
連腦頂者不論具數去尖一大寸截斷於淨盆中水  
浸每夜換易軟即將出削去皺皮以鎊鎊取白處至  
心即止以清米泔浸兩宿取出曝乾以無灰酒於大  
甕器中浸兩宿其藥及酒俱入淨釜中初用武火煎  
一食頃後以文火微煎如蟹眼柳木不住手攪時時  
添酒以成膏為度煎時皆須平旦下手不得經宿仍  
看屑如稀膠即以牛乳五升酥一升以次漸下後項

藥另以麋角炙令黃為末檳榔通草秦朮肉蓯蓉人參兔絲子甘草各一兩為末將膠再煎一食頃似稀粥即止火投諸藥末和勻約稠黏堪作丸頃出衆手一時丸梧子大空腹酒下三十九日加一丸至五十丸為度日二服至一百日忌房事服經一月腹內諸疾自相驅逐有微利勿怪服至二百日面皺光澤一年齒落更生強記身輕二年令人肥飽少食不老神仙合時須在淨室勿令陰人雞犬孝子等見 楊氏

家藏方二至丸補虛損生精血去風溼壯筋骨用鹿  
角鎊細以真酥一兩無灰酒一升慢火炒乾取四兩  
麋角鎊細以真酥二兩米醋一升慢火炒乾取四兩  
蒼耳子酒浸一宿焙半斤山藥白茯苓黃耆蜜炙各  
四兩當歸五兩肉蓯蓉酒浸焙遠志人參沈香各二  
兩五味子一兩通為末酒煮糯米糊丸梧子大每服  
五十九丸溫酒鹽湯任下日二服

簡誤

陽氣衰少虛羸畏寒者勿用肉多食令人弱房

獺肝味甘有毒主鬼疰蠱毒却魚鯁止久嗽燒服之

疏○獺水中之獸也本經味甘有毒藥性論鹹微熱  
無毒詳其功用應是鹹勝甘劣微溫小毒之物入肝  
入腎之藥也經曰邪之所湊其氣必虛虛損勞極則  
五臟之神俱不安鬼邪相挾而為病久嗽者亦勞極  
所致水不勝火火氣上炎肺為賊邪所干也鹹味潤  
下俾火氣下降則肺自清總之此藥能益陰氣補虛

損保勞極故主如上諸證也甘鹹善於解毒故又主  
蠱毒獺性嗜魚故能却魚鯁也大抵其功長於治傳  
尸勞及鬼疰邪惡有效故張仲景治冷勞有獺肝丸  
崔氏治九十種蠱疰傳尸骨蒸伏連殭殍諸鬼毒癘  
疾有獺肝丸皆妙

主治參互

同蘆會乾漆象膽青黛胡黃連啄木鳥頭狐脾虎胃  
丹砂天靈蓋治傳尸勞能殺勞蟲 孟詵尸疰一門

悉患者獺肝一具燒水服方寸七日再 葛洪尸疰  
鬼疰乃是五尸之一又挾諸鬼邪為害其病變動乃  
有三十六種至九十種大略使人寒熱沈沈默默不  
知病之所苦而無處不惡積月累年淹滯至死死後  
傳人乃至滅門覺有此候惟以獺肝散服之有效法  
如上除傳尸勞證外無他用故不著簡誤

膈臍味鹹無毒主鬼氣尸疰夢與鬼交鬼魅狐魅心  
腹痛中惡邪氣宿血結塊疰癖羸瘦

一名海狗腎雷云  
此物多偽者真者

有一對則兩重薄皮裏九核其皮上有肉黃毛三莖共一穴溼潤常如新或置睡犬旁其犬忽驚跳若狂者真也與水烏龍似以此別之凡用酒浸一宿紙裹炙香判或酒煎熟合藥

疏○膈肭海獸也得水中之陽氣故其味鹹無毒藥性論大熱李珣甘香美大溫其味與獺肝相似第其氣倍熱耳所主鬼氣尸疰夢與鬼交魑魅狐魅心腹痛中惡邪氣者蓋因真陽虛則神明不振幽暗易侵故諸邪惡纏疰為病此藥專補陽氣則陰邪自辟所以能療如上等證也鹹能入血軟堅溫熱能通行消

散故又主宿血結塊及疰癰羸瘦也近世房術中多用之以其鹹溫入腎補虛煖腰膝固精氣壯陽道也

主治叅互

同陽起石肉蓯蓉巴戟天兔絲子山茱萸鹿茸能壯陽道益精和劑局方有脬肭臍丸治諸虛勞損鬼疰邪惡夢與鬼交精氣乏絕等證

簡誤

脬肭臍性熱助陽為腎氣衰竭精寒痿弱之要藥然



而陰虛火熾強陽不倒或陽事易舉及骨蒸勞嗽等  
候咸在所忌

神農本草經疏卷十八

欽定四庫全書

神農本草經疏卷十九

明 繆希雍 撰

禽部三品

總五十六種今疏其要者四種

雞

烏骨雞  
尿白

雞冠血  
雞子

肝  
抱出卵殼

肫  
胗裏黃皮

雀卵  
附雄雀尿

天鼠屎

白鴿

諸雞

疏○按雞為陽禽屬木而外應乎風故在卦為巽其色雖有丹白黃烏其種復有烏骨之異總之性熱補陽起陰兼有風火之義惟烏骨者別是一種獨得水木之精故主陰虛發熱勞崩中等證也

簡誤

雞性熱動風凡熱病初愈癰疽未潰素有風病人咸忌之弘景云小兒五歲以下食雞生蛇蟲雞肉不可

合葫芥李食不可合犬肝犬腎並令人洩痢同兔食  
成痢同魚汁食成心瘕同鯉魚食成癰癰同獾肉食  
成遁尸同生慈食成蟲痔同糯米食生蛇蟲年久老  
雞腦有大毒食之能發疔中其毒發疔者以玉樞丹  
丸可解

烏骨雞味甘平無毒主補虛勞羸弱消渴中惡鬼繫  
心腹痛益產婦治女人崩中帶下一切虛損諸疾  
疏○烏骨雞得水木之精氣其性屬陰能走肝腎血

分補血益陰則虛勞羸弱可除陰回熱去則津液自  
生渴自止矣陰平陽秘表裏固密邪惡之氣不得入  
心腹和而痛自止鬼亦不能犯矣益陰則衝任帶三  
脈俱旺故能除崩中帶下一切虛損諸疾也古方烏  
骨雞丸治婦人百病者以其有補虛益陰入血分之  
功也

主治參互

古方烏骨雞丸治婦人產後蓐勞及陰虛等證方中

半夏人參乃立方者之誤宜去之 用骨一具煨存  
性同紅藥子白及白斂冰片雄黃朱砂乳香沒藥醋  
蜜調傅一切癰疽腫毒神効 治中惡心腹痛欲死  
但殺白鳥骨雞乘熱薄心即瘥如鬼擊卒死用其熱  
血塗心下亦妙

鷄冠血主乳難用三年老雄者取其陽氣充溢也凡  
風中血脈則口角僻喎冠血鹹而走血透肌肉故以  
之治中風口喎不正塗頰上効丹雄鷄為陽禽冠血

乃諸陽之所聚故能治中惡客忤邪氣高武痘疹正  
宗云雞冠血和酒服發痘最佳雞屬巽屬風頂血至  
清至高故也

主治參互

皆効方對口毒瘡熱雞冠血頻塗之取散 青囊襍  
纂中蜈蚣毒舌脹出口是也雄雞冠血浸舌并咽之  
勝金方諸蟲入耳雞冠血滴入即出

簡誤



痘瘡須分寒熱鷄血性溫天行瘡子虛寒者得之固  
可資其起發倘因血熱而乾枯焦黑者誤用之能更  
轉劇世人類用雞血桑蠹蟲闕發痘而不分寒熱誤  
也肝主起陰氣

疏○肝本經主起陰氣性溫可知味甘微苦入足厥  
陰少陰經今人用以治小兒疳積眼目不明者取其  
導入肝氣類相感之用也

主治參互

同蕪荑使君子胡黃連青黛五穀蟲穀精草蘆薈治  
小兒疳熱目生障翳 千金方陰痿不起用雄雞肝  
三具兔絲子一升為末雀卵和丸小豆大每五六十  
丸酒下日二服

屎白微寒主消渴傷寒寒熱破石淋及轉筋利小便  
止遺溺滅癰痕

雄雞屎乃有白臘月收之白  
鷄烏骨者更良素問作雞矢

疏○雞屎白微寒乃腸胃所出之物故復能走腸胃  
治病素問云心腹滿旦食不能暮食名為鼓脹治之

以雞矢醴一劑知二劑已王太僕註云本草雞矢並不治蠱脹但能利小便蓋蠱脹皆生于溼熱溼熱脹滿則小便不利雞屎能通利下泄則溼熱從小便而出蠱脹自愈故曰治溼不利小便非其治也本經主石淋利小便止遺溺者正此意耳轉筋者血熱也傷寒寒熱及消渴者熱在陽明也癰瘕者血熱壅滯肌肉也寒能總除諸熱故主之也日華子炒服治中風失音痰迷陳藏器和黑豆炒酒浸服治賊風風痺蓋

風為陽邪因熱而生雞屎寒能除熱雞本與風木之氣相通取其治本從類之義也

主治參互

普濟方雞矢醴治鼓脹旦食不能暮食用臘月乾雞矢白半斤袋盛以酒醅一斗漬七日溫服三盃日三或為末服二錢亦得 積善堂經驗方治一切肚腹四肢腫脹不拘鼓脹氣脹溼脹水脹等用乾雞矢一升炒黃以酒醅三碗煮一碗濾汁飲之少頃腹中氣

大轉動利下即自脚下皮皺消也未盡隔日再作

雞子主除熱火瘡癰瘰卵白微寒療目熱赤痛除心  
下復熱止煩滿欬逆小兒下洩婦人產難胞衣不出  
醯漬之一宿療黃疸破大煩熱

疏○雞子稟生化最初之氣如混沌未分之形故卵  
白象天其氣清其性微寒卵黃象地其氣濁其性微  
溫卵則兼清濁而為體其味甘氣平無毒凡癰瘰皆  
火熱為病雞子之甘能緩火之標平即兼涼能除熱

故主癰瘰及火瘡并治傷寒少陰咽痛神効

主治參互

醫方集成年深哮喘雞子略敲損浸尿缸中三四日  
煮食能去風痰 又方用頭生雞卵七枚童便浸七  
日取出煮熟每日食一枚永不出痘 仲景苦酒湯  
治少陰病咽中傷生瘡痛不能語言聲不出者用半  
夏十四枚碎鷄子一枚去黃內入半夏苦酒令滿置  
刀環中安火上令三沸去滓少少含嚥之不瘥更作

此方有神効 普濟方咽塞生瘡乾嘔頭痛食不下  
法同上無半夏 經驗祕方湯火燒灼雞子清和酒  
調洗勤洗止痛生肌 普濟方塗面駐顏雞子一枚  
開孔去黃留白入金華脂及桑礪少許紙封與雞  
抱之俟別卵抱出以塗面洗之不落半年尚紅也  
仲景方治少陰病得之二三日以上心中煩不得卧  
者用黃連黃芩芍藥阿膠雞子黃先煎三物成去滓  
膠烱盡小冷雞子黃攪勻溫服 劉禹錫傳信方亂

髮雞子膏治孩子熱瘡効見髮髮條下

抱出卵殼研末磨障翳取其蛻脫之義也蘇頌又主  
傷寒勞復熬令黃黑為末熱湯和一合服取汗出即  
愈炒研細傅下疳亦妙卵中白皮主久欬氣結得麻  
黃紫苑和服之立止

臍脰裏黃皮微寒主洩利小便利遺溺除熱止煩

疏○此即臍內黃皮一名雞內金是也臍是雞之脾  
乃消化水穀之所其氣通達大腸膀胱二經有熱則



洩痢遺溺得微寒之氣則熱除而洩痢遺溺自愈矣  
煩因熱而生熱去故煩自止也今世又以之治諸疳  
瘡多効

主治參互

醫林集要小便淋瀝痛不可忍雞肫內黃皮五錢陰  
乾燒存性作一服白湯下立愈 子母祕錄鵝口白  
瘡雞肫內黃皮為末乳服半錢并可傳之 經驗方  
走馬牙疳雞肫內黃皮不落水者五枚焙存性枯礬

一錢研細搽并治陰頭疳蝕

雀卵味酸溫無毒主下氣男子陰痿不起強之令熱多  
精有子

疏○雀屬陽其氣溫味酸其性淫故能入下焦陰分  
能補煖兩腎夫人身兩腎左為腎右為命門左屬水  
為陰右屬火為陽天非此火不能生物人非此火不  
能有生又云陽生則陰長可見命門真陽之氣乃人  
身生化之本也故命門衰敗則陰痿精寒絕化育之

道雀卵性溫補煖命門之陽氣則陰自熱而強精自足而有子也溫主通行性又走下故主下氣也弘景云術家和天雄服之令莖大不衰孟詵云和天雄兔絲子末為丸空心酒下五丸治男子陰痿女子帶下便溺不利除疝瘕以其有溫煖命門之功也肉味甘溫功用不及卵

雄雀屎療目痛決癰癰女子帶下溺不利除疝瘕

一名

白丁香一頭尖者是雄兩頭圓者是雌凡用研細甘草水浸一宿焙乾用

疏○雀屎本經無氣味察其所主應是辛苦溫之物性善消散故外用療目痛決癰癰內服治帶下溺不利疝瘕也蘇恭以首生男子乳研雀屎成泥點目中弩肉赤脈貫瞳子者即消神効蓋取其辛散拔出火毒之義也

主治參互

子母祕錄小兒中風口噤乳不下雀屎丸如麻子大服二丸即愈 梅師方諸癰癰已成膿不肯決懼鍼

者塗雀屎瘡頭即易決 普濟方喉痺乳蛾白丁香  
二十箇以沙糖和作三丸每以一丸綿裏含嚥即時  
遂愈甚者不過二丸極有奇効

簡誤

雀肉及卵陰虛火盛者忌之不可合李食妊婦食雀  
肉飲酒令子多淫凡服术人忌之雀屎療目痛非風  
熱外邪者不宜用女子帶下溺不利屬腎虛有火者  
並忌之古方同天雄服此藥性極熱有大毒非陰臟

及真陽虛憊者慎勿輕餌

天鼠屎味辛寒無毒主面癰腫皮膚洗洗時痛腹中血

氣破寒熱積聚除驚悸去面黥

一名夜明沙

疏○天鼠夜出喜食蚊蚋故其屎中淘出細沙皆未

化蚊蚋眼也所以今人主明目治目盲障翳取其氣

類相從也其味辛寒乃入足厥陰經藥本經所主諸

證總屬是經所發取其辛能散內外結滯寒能除血

熱氣壅故也然主療雖多性有專屬明目之外餘皆

可略

主治叅互

聖惠方青盲障翳夜明沙一兩栢葉炙一兩為末牛  
膽汁和丸梧子大每夜卧時竹葉湯下二十丸 又  
方五瘡不止夜明沙末每冷茶服一錢立効並治胎  
前瘡除目疾外他用甚稀故不立簡誤

白鵲味鹹平無毒肉主辟諸藥毒及人馬久患疥又云  
煖無毒調精益氣治惡瘡疥并風瘙白癩癰瘍風

疏○白鴿稟水金之氣故其味鹹氣平無毒腎藏精  
腎納氣肺主皮毛鹹入腎故能調精益氣平則兼辛  
入肺故能主惡瘡疥及白癰瘡瘍風凡毒藥之性多  
熱鴿得金水之氣故又能辟諸藥毒也其尿名左盤  
龍亦能主人馬疥瘡

主治參互


食鹽心鏡治消渴飲水不知足用白花鴿切作小片  
以土蘇煎含之嚥汁 瀉江方預辟痘毒用白鴿卵



一對入竹筒封置廁中半月取出以卵白和辰砂三錢丸菜豆大每服三十九豆子飲送下毒從大小便出也 保命集破傷中風病傳入裏用左盤龍白殭蠶各炒半錢雄黃一錢為末蒸餅丸梧子大每服十五丸溫酒下取效 聖惠方頭痒生瘡白鵠屎五合醋煮三沸杵傳之日三上 又方頭瘡白禿鵠糞研末先以醋米泔洗淨敷之

簡誤

鵠本經雖云調精益氣其用止長於去風解毒然而  
未必益人故孟詵云食多減藥力今世勞怯人多畜  
養及煮食之殊未當也



神農本草經疏卷十九